

## 再思待降

經文：西番雅書 3:14-20

這禮拜是待降節第三禮拜，咱改革宗並 m̄是真重視教會節期，但是聖誕節有特殊 ê 意義 kap 重要性，連帶對 tī 待降節也比較重視。待降節是聖誕節往前算四個禮拜日，今年聖誕節是禮拜一，12 月 3 日待降節第一主日，今 á 日是待降節第三主日。今年是所有待降節 siōng 晚 ê 情況。

主前七世紀後半期 ê 小先知有那鴻、哈巴谷 kap 西番雅。西番雅身為貴族，卻攻擊王公貴族 ê 敗壞。伊無像阿摩司一般對受剝削者表示同情。西番雅用三大段落來傳伊訊息，第一段是 tùi 1:2-2:3 預言猶大將面臨 ê 審判。第二段 2:4-3:8 宣告耶和華將 tī 憤怒中毀滅有罪 ê 列國，猶大也不例外。第三段 3:9-20 西番雅 m̄-nā 要人民環顧四周，koh-khah beh 向前看。伊看 tloh tī 末後 ê 日子，上帝 ê 醫治 kap 復興要臨到以色列，也 tloh 臨到萬邦，上帝 ê 審判是為 tloh beh 醫治 in ê 罪，罪既得醫治，上帝就 beh 再賜恩福。歷代學者對 tī 西番雅 ê 完整性有 kóa 質疑。因為今 á 日 ê 經文 kap 3 章 8 節 chìn 前 ê 語氣 kap 文體全然無全。西番雅書一開始 ê 語氣是相當悲傷 ê，到了 3:14-17 是以宣告喜樂 ê 讚美作結束。Chit 種語調上 ê 轉變相當明顯 kap 戲劇化，有 kóa 學者認為今 á 日 ê 經文是被擄了後將回國前被加入 ê。無論如何西番雅對千禧年 ê 異象 kap 其他先知所見卻十分類似。彌賽亞 ê 國度是包括萬邦 ê，而上帝 ê 選民則是這國度 ê 中心，因此西番雅特別寫到以色列人 tī 榮耀得勝之日 ê 情形：罪惡消滅，萬民歡樂(v.14、15)；耶和華甚至對 tloh 錫安講：「你 ê 上帝將 kap 你同在；伊 ê 大 ē-tàng hō 你 tloh 勝。伊要因你歡悅；伊 ê 慈愛要賜你新生命。伊要因你喜樂歌唱。」(v.17)一切 ê 困苦災禍 lóng 過去了，以色列將會「譽滿天下，再次興旺。」(v.20)。西番雅 ê 審判異象，是 tùi 猶大被毀壞 ê 廢墟中，看 tloh 一片亮光，雖然遙遠，卻是 thang 仰望得 tloh, 儘管上帝恨惡邪惡，但伊 ê 憐憫終必得勝，上帝最後必將更新 kap 復興伊 ê 子民。

今 á 日咱 ê 社會 kap 宗教 ê 情況 kap 西番雅時代頗為類似，宗教牽動著 kui-ê 社會 ê 變遷。而且無論各種宗教之間 ê 緊張 kap 仇恨，基督教來講，靈恩運動 ê 興起 kap 教會普遍宣揚成功神學，認為只要信心夠堅強或祈禱夠懇切，就 ē-tàng 憑信心得 tloh。Chit 種神學思想是偏差 bē 合聖經教導 ê，卻因容易 hō 人接受而橫行 tī 世，tùi án-ne 造成宗教組織愈龐大，民間對教會就愈加反感。這是今 á 日教會面臨 ê 危機，如果咱反思西番雅 ê 預言，kap 聖經 ê 啓示，相信基督再臨 ê 日子無遠了，而屬主 ê 兒女該怎樣做醒過活 neh?

西番雅所宣告 ê m̄ 是一篇新奇 ê 信息；但卻突顯出西番雅是一位敢宣講末日審判，也就是「耶和華 ê 日子」ê 人。當時傳統 ê 信仰已經崩潰，伊簡潔有力地道出 in ê 結局。同時也傳揚上帝 ê 憐憫 kap 拯救，只要以色列民肯悔改必得救贖。詩篇 137 篇是西番雅成書後 ê 作品，詩人對佇被掠心情描述如下：「阮坐 tī 巴比倫河畔，一想起錫安就禁 bē-tiâu 哭了。Tī 河邊 ê 柳樹上，阮 kā 豎琴掛了起來。俘虜阮 ê 人 ài 阮唱歌；折磨阮 ê 人 ài 阮歡娛 in。In 講：來，為阮唱一曲錫安 ê 歌！身處外邦異國，阮怎 ē-tàng 唱頌讚上主 ê 歌 neh? 耶路撒

冷 ah,若是我 bē 記得你,願我 ê 右手枯萎,koh-khah àn 怎 to bē-sái 彈琴!我若是 bē 記得你,若是無用耶路撒冷爲我 siōng 大 ê 喜樂,願我 ê 舌頭僵硬,koh-khah àn 怎 to bē-sái 唱歌!上主 ah,求你記 tōa 以東人 ê 暴行。Tī 耶路撒冷淪陷之日,in 直嚷著:拆毀!拆毀!kā 伊夷爲平地!巴比倫哪,你 beh 被毀滅;照著你加 hō 阮 ê 殘暴報復你 ê 人,伊是 jōa-nih-á 有福 ah!抓起你 ê 嬰兒,kā in 摔 tī 石頭頂 ê 人,伊是 jōa-nih-á 有福 ah(1-9)!」我常強調 tī 逆境中 ē-tàng 感恩 ê chiah 是真正有福氣 ê 基督徒。咱知影當時 ê 以色列人已經國破家亡,被擄到巴比倫。西番雅卻要餘民頌讚耶和華,伊講 chhōe 耶和華 ê 人 thang tī 伊憤怒 ê 日子得拯救。這也是西番雅要餘民頌讚耶和華 ê 精神所在。上帝 ê 子民 tī 世上有苦難,只要 tī 苦難中 khiā 立得 tōa。信心會因考驗顛倒 koh-khah 堅定。這 m̄ 是出 tī 家己,tùi án-ne 是上帝 ê 恩典。因此以色列會 koh 再受耶和華眷顧,上主 m̄-nā 解除懲罰,殲滅仇敵。甚至應允將 kap 民同在 (v.15)。所以咱 tī 困境中要 koh-khah 頌讚耶和華。

西番雅預言 hō 咱想 tloh 待降節 ê 意義。待降節 hō 咱再次回顧過去,紀念耶穌 ê 降生 kap 救贖。咱一方面要以悔改認罪 ê 心來領受上帝 ê 恩典,以及基督 koh 來審判列國 ê 應允。一方面應以歡喜、渴望 ê 心情來迎接耶穌 ê 誕生,hō 恩典 kap 咱 ê 信仰生活連結。今年待降節第四主日是 12 月 24 日,正是迎接聖誕節前 ê 主日,也是聖誕夜。今年聖誕慶祝晚會和聖誕燭光禮拜將取消,因爲 kui-ê 主日 ê 聖誕活動 tùi 早起一直延續到暗時,án-ne 對遠來或有 gin-á ê 信徒太 thiám,所以長執會決定取消聖誕燭光禮拜,改 tī 主日崇拜時一併慶祝。聖歌隊下晡 beh 去 Framingham ê Kathleen Daniel Healthcare Center 報佳音,欲參加者請 tī 當日 kap 聖歌隊同齊前往,將耶穌基督降生 ê 好消息報 hō in。同時學青團契也計畫到教會 ê 長輩厝裡報佳音,一方面關心年老兄姊,另外一方面將耶穌基督誕生 ê 好消息 kap in 同齊分享。

北美教協退休宣教師關懷組 tī 今年 ê 年會中報告,每年 tī 聖誕節期教協 lóng 會寄禮金 kap 聖誕卡 hō 眾宣教師,感謝 in 對台灣 ê 犧牲 kap 奉獻。大部分 ê 宣教師生活 lóng 無寬裕,in 將人生 siōng 美 ê 歲月獻 hō 台灣,晚年相當孤單,因此 theh-tloh 禮金了後,in lóng 會儘量回 phoe 並以感恩 ê 心享用。有 ê 退休宣教師想念臺灣,請晚輩載伊去 3 小時以外 ê 所在食台灣料理。咱教會也 thang 以 kā 聖誕聚餐費用省落來,作爲關懷退休宣教師 ê 奉獻。

Chit-pái tng 來台灣特別到馬偕醫院探訪舊年 CPE 受訓時關心 ê 一位先生,伊 tài tloh 一種罕見疾病。起初是細胞異常增長,後來也做化療。舊年聖誕節我 bat 寄賀卡 hō 伊,但一直無收 tloh 伊 ê 回 phoe。也 bat phah 手機 hō 伊也無人接。Chit-pái tng 去 chhōe 機會到馬偕去看伊。伊講當伊收 tloh 賀卡時本來想回 phoe,卻因全身癱瘓 bē-sái 回 phoe。而手機因爲是公司 ê,長期生病 bē-sái 再使用公司 ê 手機,難怪無人接聽。雖然 án-ne 伊 iáu 是滿面笑容,伊講有天暗時伊夢見上帝要伊動一動右手,果然隔工早起右手 ē-tàng 活動。所以伊信心滿滿 ê kap 我相約明年馬偕花園見面,伊相信以馬內利 ê 上帝會和伊同在。當我 beh 求爲伊代禱時,伊 kap 母親異口同聲 ê 答應,hō 我感覺真欣慰,舊年我去探訪時伊母親嘴裡不時唸著阿彌佻佛!現在伊 kap 母親 m̄-nā 雙手合起目調閉上,祈禱完後也同聲阿們。Tī 待降節前夕 ē-tàng 有 án-ne ê 體驗 hō 我內心也感謝上帝。願上帝保守他互他能體驗上帝恩典成做他 ê 子民。

西番雅指出以色列人 ê 信仰，是建立 tī kap 上帝 ê 關係上，伊不斷提醒選民，千萬 m̄ 放棄 chit 種特殊恩典 ê 關係，更新 ê 以色列人因 in ê 上帝而慶祝，上帝也因伊 ê 人民而歡樂。這正是阮/咱做爲基督徒生存 ê 意義。除非阮/咱 ê 生活建立 tī kap 上帝 ê 關係之上，上帝 ê 生命 kap 伊 ê 喜樂，要等到人會曉彼此相愛 chiah 會完全。因此阮/咱真正需要點 toh 所有 ê 燭光，hō 世人看 tioh ng 望。Ng 望每位兄姊 ē-tàng 慷慨獻出你 ê 愛心活出信仰，獻上 siōng 有意義 ê 待降節來迎接基督誕生。